



SERVISIO METEOROLÓGIKO ANTIANAN HULANDES I ARUBA

Seru Mahuma z/n, Kòrsou, Antianan Hulandes
Tel: +599 9 839.3366 Fax: +599 9 868.3999

KOMUNIKADO PA PRENSA

TEMPORADA DI ORKAN 2009: PLANIFIKÁ TA ESENSIAL!

Djaluna awor, promé di yùni, temporada di orkan 2009 pa Region Atlántiko di Orkan (parti nort di Osean Atlántiko, Laman Karibe i Golfo di Mèksiko) ta kuminsá ofisialmente. E temporada aki lo terminá atrobe riba 30 di novèmber.

E kantidat di siklon tropikal ku a forma aña pasá den e region aki tabata ku diesseis tormenta tropikal, ocho orkan i sinku orkan fuerte, mas o ménos 64% riba e promedio di hopi aña (diesun tormenta tropikal, seis orkan i dos orkan fuerte).

E sistema mas signifkante ku a afektá tantu Islanan ABC komo Islariba den 2008 tabata **Omar**. E distansha mas chikitu entre di su sentro i Islanan ABC tabata mas o ménos 180 kilometer i pa Islariba, esaki tabata 105 kilometer. **Omar** tabatin un área di biento fuerte mas grandi ku kustumber na parti sùit di su sentro. Esei a resultá den biento fuerte for di direkshon suitwèst ku ráfaga ku forsa di tormenta tropikal ku a kousa laman bruto ku a afektá espesialmente kostanan sùit i wèst di Islanan ABC riba 14 i 15 di òktober. Áwaseru fuerte relashoná ku **Omar** a ser opservá riba tur seis di nos islanan i lokalmente tabatin inundashon signifkante. A pesar di ku sentro di e orkan a pasa basta serka di Islariba, a opservá solamente biento sostené ku forsa di tormenta tropikal na Islariba ku algun ráfaga ku forsa di orkan.

Komité di Orkan pa Region IV di [Organisashon Mundial di Meteorologia](#), ku ta konsistí di representantenan di Servisionan Meteorológiko di Kanada, Merka, Mèksiko, paisnan Sentro Amerikano i Karibense i tambe Kolombia i Venezuela durante di nan reunion anual a disidí di retirá nòmber di tres orkan ku na 2008 a kousa un kantidat signifkante di morto i daño material. P'e motibu aki e nòmbernan di *Gustav*, *Ike* i *Paloma* lo ser reemplasá pa respektivamente *Gonzalo*, *Isaias* i *Paulette* na aña 2014.

E nòmbernan pa siklonnan tropikal den Region Atlántiko na 2009 lo ta: *Ana*, *Bill*, *Claudette*, *Danny*, *Erika*, *Fred*, *Grace*, *Henri*, *Ida*, *Joaquin*, *Kate*, *Larry*, *Mindy*, *Nicholas*, *Odette*, *Peter*, *Rose*, *Sam*, *Teresa*, *Victor* i *Wanda*. E nòmbernan aki lo ta idéntiko na esnan ku a ser huzá na aña 2003 ku eksepshon di *Fred*, *Ida* i *Joaquin*. *Fred* ta reemplasá *Fabian* ku a kousa hopi daño na Bermuda durante di sèptèmber 2003 miéntras ku *Ida* lo bini na lugá di *Isabel* ku a kousa daño signifkante i diesseis morto na partinan di estado North Carolina un par di dia despues di *Fabian*. Na final di sèptèmber 2003, orkan *Juan* a yega tera na Nova Scotia, Kanada i tabata responsabel pa kuater morto i tambe bastante daño na kasnan, problema ku koriente i palunan ku a ser tumbá.

Pronostikadónan ta antisipá un temporada di orkan ku un kantidat promedio di tormenta tropikal i orkan. E pronóstikonan aki di tantu [Colorado State University](#) i [National Oceanic and Atmospheric Administration](#) na Merka ta basá riba entre otro temperatura di laman den partinan tropikal di Osean Atlántiko i Pasífiko, estado di e fenómeno El Niño, distribushon di preshon di aire i e biantunan relashoná ku esaki riba Atlántiko. E pronóstikonan aki no ta duna ningun indikashon na ki momentu ni na unda e sistemanan pronostiká lo desaroyá ni kon nan lo bai move. Pa e motibu aki ta urgi outoridat i pueblonan lokal di nos islanan pa planifiká adelantá i pa tuma e prekoushonnan nesesario den kaso ku emití alerta i atvertensha.

Servisionan Nobo:

- * Kuminsando e aña aki, Servisio Meteorológiko lo emití Boletinnan Spesial pa eventonan di wer ku ta apnormal, ta kousa inkonveniensa general òf preokupashon den pueblo (ku ta rekerí atenshon i akshon di outoridatnan di brantwer i polis) i ku no por ser deskribí na un manera adekuá den un pronóstiko di tempu.
- * Doñonan di telefon selular lo ta kapas pa haña e último pronóstico di wer riba nan aparato via di <http://www.weather.an/mobile>.
- * Servisio Meteorológiko lo emití un Resumen Mensual riba aktividat di siklon tropikal durante di temporada di orkan.

Manera ta kustumber, Servisio Meteorológiko di Antianan Hulandes i Aruba (MDNAA) lo monitóriá desaroyo di e sistemanan aki i otro áreanan di mal tempu ku ta menasá tantu Islariba komo Islanan ABC, ku hopi atenshon. Den kaso ku esei ta nesesario, e servisio aki lo emití alerta òf atvertensha na tempu den kordinashon estrecho ku [National Hurricane Center](#) na Miami, Florida, ku ta un asina yamá Sentro Meteorológiko Regional Espesialisá di Organisashon Mundial di Meteorologia. Mas aleu, riba un eskala nashonal, nos lo ko-ordiná ku outoridatnan di kombatementu di desaster riba kada isla pa konsientisá públiko riba e peligernan ku e sistemanan aki ta forma di manera ku nan por prepará nan mes pa temporada di orkan. Lesa mas informashon riba siklon tropikal den nos brochurenan ku yama "[Guide on the Tropical Cyclone Early Warning System for the Netherlands Antilles and Aruba](#)" i "[Hurricanes and Tropical Storms in the Netherlands Antilles and Aruba](#)" ku por ser haña riba nos página di Internet (<http://www.meteo.an>).

Un bon planifikashon ta esensial pa limitá daño personal i daño material!
